

# Powšitkowne WOZJEWJENJA

njedźelu, 6. oktobra 2024

## TCM chce woporam powodźenja w Pólskej pomhać

Dwě wosadže w Pólskej, kotrež stej wot powodźenja jara synje potrjehenej, chce Towarstwo Cyrila a Metoda z.t. (TCM) ze swojej akciju „Łužica pomha“ podpěrać. Kontakt k nim nawjaza wone přez swojeho kruteho partnera w susodnym kraju, prelata dr. Dariusza Kruczyńskeho. Wón ma jako direktor Carity w Etku zwisk k direktoram druhich biskopstwow a je tak zhonił, kak móhli we wosadomaj Ustroń Ślaski a Głuchołazy najlěpje pomhać. Trjebaja tam předewšěm elektriske nastroje, kotrež buchu dospołnje zničene, na přikład chlódžaki a płokawy. Wón na to skedźbnja, zo su předewšěm seniorojo wot podpěry wotwisni. Štóž chcył wot powodźenja domapytanu ludnosć podpěrać, njech přepokaza pjenjezy na konto TCM: Cyrill-Methodius-Verein e.V., IBAN: DE 65 7509 0300 0008 2823 66, hesło: „wulka woda“. Štóž sej darowansku kwitowanku přeje, měł swoju adresu podać, pak telefonisce pod čisłom (0 35 91) 55 02 10 pak z mejlku na TCM@Posol.de.

## Putnikowanje do Krupki

Pěše putnikowanje młodostnych do Krupki wotměje so klětu wot njedźele do pjatka, 20. do 25. julija. Putniske kemše budu srjedu, 23. julija, w 10.00 hodź.

## Prěnjowoprawjenske džěci přeprošene

Dekanatne dušepastyrstwo přeprošuje wšitke džěci, kotrež so na přenje swjate woprawjenje přihotuja, na zhromadny dzeń srjedu, 20. nowembra, wot 9.00 do 15.00 hodź. do Njebjelčic. Započatk je z Božej mšu w cyrkwi. Zajimcy njech so hač do pónđzele, 21. oktobra, online přizjewja. Link je pod [www.posol.de](http://www.posol.de) podaty. Za wudawki dnja zběraja wot kóždého wobdźělnika přinošk pjeć eurow.

## Duchowna hudźba

Budyska Katolska tachantska wosada a Towarstwo tachantska hudźba přeprošujetej wšitkich zajimcow na nyšpor duchowneje hudźby do tamnišeje tachantskeje cyrkwyje. Na nim předstaji njedźelu, 20. oktobra, we 18.00 hodź. hudźbny duo Enšle-Lamprecht ze Salzburga a Weimara kaž tež Susanne Ansong jako hósć „Nikodemusowy pasion“. Zastup je darmotny. Po tym budže kolekta. Link k dalšim informacijam je pod [www.posol.de](http://www.posol.de) podaty.

## Na sinfoniski koncert do Budyšina

Twórby serbskeju komponistow Jurja Pilka a Bjarnata Krawca steja w srjedźišću 1. sinfoniskeho koncerta Budyskeho Serbskeho ludoweho ansambla (SLA) njedźelu, 20. oktobra, w 17.00 hodź. na tamnišej žurli. Mjez druhim zaklinča kompozicija Jurja Pilka pod titulom „Elegija“ kaž tež „Šěsć serbskich rejoy za sinfoniski orchester op. 77 c“ Bjarnata Krawca. Na kóncu koncerta diriguje nowa nawodnica orchestra SLA Katharina Dickopf „Sinfoniske reje op. 45“ ruskeho komponista Sergeja Rachmaninowa. Wšitcy zajimcy su wutrobnje přeprošeni. Zastupne lisciki za koncert móža sej zajimcy w SLA abo online kupić. Wotpowědny link je pod [www.posol.de](http://www.posol.de) podaty.

## **Nazymska akcija „Łužica pomha“**

Towarstwo Cyrila a Metoda z.t. (TCM) chce tež lětsa ze swojej nazymskej akciju „Łužica pomha“ diecezanskemu zwjazkej Charity w pólskim Ełku zaso pomhać. Tam wjesela so nade wšěm, štož w swójbje trjebaš, kaž su to drasta, črije, artikle hygieny a kosmetika za žony a dźěći, ale tež płokanski próšk, kuchinske graty abo pampersy za dźěći runje tak kaž za dorosćenych. Wotedać hodža so dary pjatk a sobotu, 8. a 9. nowembra, kaž tež pjatk a sobotu, 15. a 16. nowembra. Dokładnišo so to sčasom wozjewi.

## **Sponsoring a fundraising**

Norman Reitner z Drježdžanskeho biskopskeho ordinariata poskićuje na próstwu Towarstwa Cyrila a Metoda z.t. (TCM) kurs k tomu, kak móžeš projekty derje planować a k tomu pjenjezy na wšelakore wašnje požadać. Dalekubłanje na polu sponsoring a fundraising wotměje so sobotu, 9. nowembra, wot 9.00 do 16.00 hodž. na „Radlubinje“ w Ralbicach. Wobdźělic smědža so maksimalnje 30 wosobow. By-li zajim wjetši był, by so TCM wo dalše zarjadowanje prócowało. Jědź a napoje budu přihotowane. Zajimcy – nimo člonow TCM su tež dalši přeprošeni – měli so online přizjewić. Link na to je pod [www.posol.de](http://www.posol.de) podaty.